

Kafaramero P'awuloosakkoki Handdaa Filmoona Tos Tabano

Filmoona kaʔaddeesame amaniye, kak'ollasiyaasi min kawaakokki maganaalkko kooyya amame hedamara. Filmoona Anasmoosa kaʔamamaro diyyiti abanaaye, hikki diyyitina goottakeessakko iise baye takkobeere minkashaano kagire P'awuloosane wota eseleen, gara kap'awuloosane Anasmoosa kakiristtinnaa ammano atate, P'awuloosa Filmoona tos kas'aafere handdaa Filmoona abbaabate usu tos emeeto gutii kagiro diyyiti Anasmoosa wota goggowogarroo kashaadisaro, adanoyinna gidida Anasmoosa amanii mankkollee maraan hittakko horenbbaan kaʔammano abbi aani usu goggok'op'aroon kuwaarre diyyii aani usu goggotootinonkko segaara.

Raattoo Hikki Mas'aafa Kaʔabera

Tabano 1-3

Kap'awuloosa galata Filmoonaan 4-7

P'awuloosa gara kaʔanasmoosa kaʔebaatero kaʔatii ebi 8-22

Gudisano 23-25

¹ Yesuusa Kiristoosa maraan kashaamero P'awuloosakkona abbikkaani T'imotoosakko, aaloo no kageelaatannona noonne wota kafelaro Filmoonaan.

2 Abbattaani Afibiyaan, noonne wota wotaadara kalleeron Arikip'aan minkkaayi kakukkumaro amaniluun,*

3 Waa Aabbokkaanikkona, Goottaa Yesuusa Kiristoosakko sinonna nogodda isinuun halleeto.

Tafilmmona geelanjeenna ammano

4 Ku ebikkeeyi shaada arggetto Hedokkee galataara.

5 Aalanttina Goottaa Yesuusaan kaʔabtto amanona k'ulloolee dubbaan taʔabtto geelanjee maalera.

6 Kiristoosaa mankkoginno maraan ayees kaʔidan dubba aaloo goggoʔaddeesson, amanokkaa kakkaleetun geegisaa goggoʔataattoon ebaatara.

7 Abbikkee! K'ulloolekotti wodana mankkofolssisseewun geelanjjettaakko geggeloo oʔatiinna goggoʔinna helayera.

P'awuloosa Anasmoosa maraan wogarssi ebaate

8 Haanssun felin kadootisaro ati goggofelttoon ku ajajin Kiristoosaayi jabuu iin gogirtena,

9 Goortta jaarsana gidda ade Kiristoosa Yesuusaan kashaamera ani P'awuloosa geelanjee ku ebaatara.

10 Minkashaano giraan kaʔumulero erekkee Anasmoosa maraan ebaatara.

11 T'aye kuun laʔo kallayikkiye; gidda ade ku-unna leere iyyeen laʔo kaʔabo leera.

* 1:2 «Minkkaayi kakukkumaro amaniiluun»: hezi tagiriikkii «Minkkaayi kagiro min kawaawun» amara. 1:2 K'ol. 4:17. 1:10 K'ol. 4:9.

¹² Wodanattee malee kalleero usu abbaabe ku tos farera.

¹³ Wongala maraan ani takkoshaameree banzettaayi liire iin goggohanddayiroon haasayiin dootere.

¹⁴ Ayesuun gozameen ati kafelatto kazidankki ayees dubba geelanjee kuwaarre hunnaa goggolleenoonkko kunne hamakkarooni konna felin lakkodootaro.

¹⁵ Woddaasan Anasmoosa goorata kic'c'aruun kukko kakkoonkalebeera, usu k'op'ayidde eerinawun ku dollee goggozadallaayissonya.

¹⁶ Hittakko horenbbaan ade diyyii aani halleenonni giraan diyyikko karooraro awzallockki abbiya; iin kageelaameya, halleewo kuwaarre sooyi usu handdaanokkeessa ku mankkomaaddinaro maraan ayyaanaa ade Kiristoosaa abbi kuun mankkollee maraan kuyeen ade aaloo kageelaameya.

¹⁷ Goortta in saatii aani gotootite in goggok'op'aattoo malee yela usu ata.

¹⁸ Usu ku kakkomiirzera ayees gogire goorttun amzaatatta usu gutii goggitte in gutii tootii.

¹⁹ Ani P'awuloosa hikka genetiteeyi s'aafera, usu tazabo anza ani murnnara. Ati metekkawun kakkee mankkoleetewun konna lakkozaayeesinnaro.

²⁰ Abbikki Goottaayi in goggomaaditon dootara, Kiristoosaa wodanattee foolssisi.

²¹ Iin kazajajaamatto laano abddataa, ani ka-hoosatarokkona roorisi kafelnnatto addeesere s'aafara.

²² Hikkakkona kakkalee, ebikkisin abbaab helayire ani isin tos emeeyin abddi

mankkoyelataro maraan takkofoolssaro banze
iin ekkaasa.

Tagachchoo nogodda

²³ In wota Kiristoosa Yesuusaa kashaamera
Ep'afira nogodda farramara.

²⁴ Usumaleenna inne wota ofelaraankko
Mark'oosa, Arsit'irokoosa, Deemasana
Luk'aasana nogodda farramaraan.

²⁵ Tagootta Yesuusa Kiristoosa sino isin wota
halleeto.

1:23 K'ol. 1:7; 4:12. **1:24** Ofa. Fe. 12:12; 25; 13:13; 15:37-39;
19:29; 27:2; K'ol. 4:10,14; 2 T'im. 4:10,11.

Ammato Oꝛusub
The New Testament in the Baiso language of Ethiopia,
Latin script

copyright © The Word for the World International

Language: Bayso (Baiso)

Contributor: The Word for the World International

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-04-30

PDF generated using Haiola and XeLaTeX on 29 Apr 2025 from source files dated 30 Apr 2025

6e4c0290-17d8-5d1c-ba1a-8827fe99140e